

清 王仁俊輯

(國學文庫第七編)

遼

文

萃

附藝文
志補證

全

中華民國二十二年十二月重印

清 王仁俊輯

(國學文庫第七編)

遼

文

萃

附藝文
志補證

中華民國二十二年十二月重印

自序

歲在戊戌客武昌官報局暇編遼文十四卷既脫藁嘉興沈子培比部曾植侯官陳石遺孝廉衍慇懃付梓因循未果嗣聞江陰繆筱珊先生方輯此文遂置之甲辰春自寶塔洲還楚省先生示新刊六卷比觀舊稿則雲自在堪本外尙賸百餘篇復發篋陳書搜闕補遺凡所已刊悉予刪落黃陂陳士可徵君毅復段吾遼東行部志承德府志踵事訂補都爲八卷於是契丹遺文蓋萃於此矣士可又敦促刊版旣成客有尋繹遼宋交涉論及燕雲故事者甲曰有宋乘遼之衰約金夾攻燕雲固復矣而亡不旋踵宋之失策未有甚於此舉者也曷若唾棄燕雲任金人之用兵而宋得以固吾圉之爲愈也乙曰祖宗之地尺寸不可與人

春秋之義也夫金遼之戰名爲何起以我中國之土地爲名也自石晉獻地十六州之淪陷於腥羶者蓋百有餘年矣當宋之盛樞密諸臣不能於澶淵之役據理力爭使虎狼之遼得所盤踞以佃以牧以長其子孫已爲失策之大者往者不可諫矣方事之殷假令宋不能聯合金人以力拒遼虜爭回險要反守中立放棄祖國根據地於版圖外概置之不論不議以聽交戰國之蹂躪詎非宋之大辱也耶烏虜齊襄復九世之仇君子韙焉燕雲之仇匪直九世矣宋力能復則復之力不能復則遼祚方衰勢必爲金獨據與爲金所獨據孰若夾攻而有分得故地之一日而大仇亦於是可復耶至於宣和寒盟兵端遂開靖康之變二聖蒙塵此宋之不修內政不講外交任用僉壬上下搆克長國家而務財

用者之所致也非戰之罪也必若所云是必袖手旁觀置身局外熟視金之坐取燕雲而可也嗟乎宋縱不與金約不夾攻遼金未有不取燕雲者忍使吾之故地不亡於遼卽亡於金也豈不痛哉傳有之曰木必自腐而後蟲生焉宋之末造有童貫蔡攸等以治兵有梁師成之徒以理財有趙良嗣郭藥師輩爲之通使命任交涉雖無金人宋亦未必不亡也二客之言如是余不能決之也姑記之序吾書至於編輯大旨別詳例言考證所及綴以藝文不以卷軸之隘而濫收猶先生之意也

光緒三十年歲次甲辰十二月之望吳縣王仁俊序於楚孫卿故里

述例

上古至隋唐至明皆有總集惟五代及遼闕如仁俊自甲午散館職慨然曰是不才之責也乃發憤爲五代文薈遼文萃至戊戌而遼文成易序卦傳萃者聚也小爾雅廣言萃集也遼文命名竊取斯義

詔令作者金文雅因年號注明某宗金文最則第標某年不著某宗今從文最以詔令多臣工代草也然有史明載某帝手著者則表之

金文最於錄金史者不注某卷某傳繙閱爲難今悉詳注

撰文之年代及其事之起訖有須考核者略加案語亦以文紀事之例也

有一文而二書采引小有異同者附入案語其異同較多者另據某書

錄之

金文最於西夏高麗在臣服遼時者采之此則止錄高麗與遼往還者其西夏文已別編不復出

凡刻入遼文存者概從刪去惟作者姓字履貫繆本未考俊舊稿一卷因文論人頗資考核今依二書次序編列作者已見前刻仍不芟除南宋文範金文雅均有作者考今依其例

凡遼文已佚而篇目猶散見他書者彌可珍貴搜而輯之冀不負作者之苦心也

遼人藝文史無專志近人編錄亦尙未盡今補之證之以完移刺氏之

文獻

遼自唐季基於朔方造邦本席於干戈致治能資於黼黻觀市赦罪則
膺合六典之規臨軒策士則恪遵三歲之制政刑日舉品式備舉見托
克托進遼史表於此見遼人文之盛故金初無文字自金太祖得遼人
韓昉而言始文非偶然也

後唐天成三年王晏球等獲契丹絹書一封來進明宗命宣示羣臣莫
有識其文字者契丹本無文記唯刻木爲信漢人陷蕃者以隸書之半
就加增減撰爲胡書同光之後稍稍有之見五代會要二十九據此是
遼本無文記在後唐時已然

遼自太宗建國號大遼以後聖宗統和元年後國號曰大契丹道宗咸
雍二年復稱大遼遼史俱沒而不書見潛研堂跋尾據此知國號更易

史氏猶深沒其文況詔令章奏哉

壽隆二年劉輝上書曰宋歐陽修編五代史附我朝於四夷妄加貶訾令臣下妄意作史臣請以趙氏初起事蹟詳附國史上嘉其言據此是輝嘗與史事而監修史館輝未繫銜則史闕者多矣

遼書禁甚嚴傳入中國者法皆死見夢溪筆談據此知流傳出境罪至於死文字安得而傳耶

金章宗命民間遼時碑誌及文字悉送上官見金史據此知遼碑版至今間有存者蓋由乎此然轉因此詔而遼文之流傳於民間者百無一二矣

遼人主盟將一百年如南衙不主兵北司不理民縣長官專用文吏其

罰可記之事多矣泰和中詔修遼史書成尋有南遷之變簡冊散失世不復見今人語遼事至不知起滅凡幾周春曰余輯遼詩話徧閱十六州志無足采者卽遼時事迹寥寥俊輯遼文蓋與嘗兮同慨矣說詳俊所續遼詩話

有史載詔書約文申義者如乾亨六年霜寒災民饑詔三司舊以稅錢折粟估價不實其增以利民十三年詔諸道置義倉歲秋社民隨所獲戶出粟博倉社司籍其目歲儉發以振民十五年詔免南京舊欠義倉粟仍禁諸軍官非時畋牧妨農興宗卽位禁諸職官不得擅造酒麩穀有婚祭者有給文字始聽太平七年詔諸屯田在官斛粟不得擅貸在屯者力耕公田不輸稅賦十五年又詔山前後未納稅戶並於密雲燕

樂兩縣占田置業人稅大延繼之亂連年詔復其租民始安靖均見食貨志上統和二年詔以南北府市場人少宜率當部車百乘赴集開奇峯路以通易州貿易開泰中詔諸道貧乏百姓有典質男女計傭價日以十文折盡還父母開泰中詔禁諸路不得貨銅鐵以防私鑄又禁銅鐵賣入回鶻道宗之世詔楊遵勗徵戶部司逋戶舊錢得四十餘萬鐵統和初令有司諭諸行宮布帛短狹不中尺度者不粥於市均見食貨志下

有史載表奏止錄大意者如太平九年燕地饑戶部副使王嘉請造船募習海漕者移遼東粟餉燕議者稱道險不便而寢開遠軍故事民歲輸稅斗粟折五錢耶律穆濟守郡表請折六錢見食貨志上聖宗統和

初燕京畱守司言民艱食請弛居庸關稅以通山西糴易見食貨志下有詔止二三語者如道宗紀詔曰方夏長養鳥獸孳育之時不得縱火於郊禮志正旦朝賀儀之傳宣云履新之歲與公尊同之二句

有佚句僅存者如契丹王鴻基鑄兩佛像銘其背曰願後世生中國見嵩山集此道宗事又建州大悲心陀羅尼石幢首云奉爲承天太后昭聖皇帝皇后萬歲承天乃聖宗太后尊號昭聖乃聖宗初卽位時尊號見承德府志藝文

有似文而實爲口說者如讓蕭托雲請益軍詔叛者旣服兵安用益且前日之役死傷甚衆若從汝謀邊事何時而息見本傳

有文字太俚者如燕軍士妻寄夫詩曰垂楊傳語山丹你到江南艱難

你那裏討箇南婆我這裏嫁箇契丹見軒渠集

有記事太質者如獨樂寺劉成碑故尙父秦王請談真大師入獨樂寺
修觀音閣以統和二年冬十月再建上下兩級東西五間南北八架大
閣一所重塑十二面觀世音菩薩像見盤山志又幽州盧文進嘗云陷
契丹中屢入絕塞正晝方獵忽天色晦黑衆星燦然問蕃人云所謂笠
卻日也以此爲常頃之乃明方午也見南部新書

有遼人使命爲對偶文字者如李儼持盤中杏曰來未開花如今多幸
蔡京舉梨云去雖葉落未可輕離見老學庵筆記劉沆使虜契丹館客
曰有酒如澗繫行人而不佳沆應聲曰在北曰狄吹出塞以何妨見劉
邠中山詩話按興宗紀重熙十年冬宋遣劉沆王整來賀應聖節卽此

事高麗肅宗明孝王七年遼遣中書舍人孟初來賀生辰兵部員外郎金緣爲館伴初見其年少頗易之一日竝轡出郊雪始霽初唱云馬蹏踏雪乾雷動緣卽對曰旗尾翻風烈火飛初愕然曰眞天才也見東國史略

有石刻太殘泐者如太康五年武州寧遠縣經幢記止存三十餘字凡屬此類概從割愛附記於此後有續者勿據此以補吾書也

遼文萃目次

賜進士出身專辦湖北全省學務處審訂科候補知府
國史館協修 加三級紀錄三次 前翰林院庶吉士 吳縣王仁俊輯

卷一

詩

以司空大師不肯賦詩以詩挑之

興宗

一

和詩二首

沙郎思孝

一

天安節題松鶴圖

沙郎思孝

二

詔冊

免黥詔重熙二年

三

使高麗崔延巖還齋詔重熙七年

三

使高麗金元沖還齋詔重熙七年

四

又詔

四

又詔

四

- 遣大理卿韓保衡賜高麗王詔重熙八年……………五
- 遣王永言賜高麗王詔重熙十一年……………六
- 遣蕭愼微等賜高麗王詔重熙十二年……………七
- 復高麗王請停權場詔大安四年……………八
- 秦晉王耶律淳立赦詔保大三年僭改建福元年……………八
- 遙降天祚帝爲湘陰王詔保大三年……………九
- 天祚聞耶律淳卒詔德興元年……………一二
- 改元與百官詔延慶元年……………一四
- 立石敬瑭爲大晉皇帝卅天顯九年……………一四
- 遣蕭愼微等賜高麗王卅重熙十二年……………一七
- 遣宋璘賜高麗王卅重熙十六年……………一八
- 金主爲東懷國皇帝卅天慶九年……………二〇
- 勅
- 賜高麗將勅統和二十八年……………二〇

甲午以錦衣銀器等物賜鎮將勒統和二十八年……………二一
將柴冊遣使勒并羣臣對……………二一

卷二

表

請立太祖表……………耶律赫嚙……………二三

高麗李守和回表統和二十八年……………二三

高麗朴寅亮陳情表壽隆二年……………二四

以涿州降宋表保大二年……………郭藥師……………二四

蕭太后遣使至宋納款稱臣表德興元年……………二六

僞爲夏元昊歸款表……………二七

高麗王謝表……………二八

奏疏

左右軍國要務奏會同八年……………二八

討晉帝石重貴杜重威奏……………耶律圖勒錦……………三八

募人穰奏乾亨五年……………韓德讓 二九

請復民租奏乾亨五年……………室 昉 二九

農事奏統和……………耶律昭 二九

諫濫刑奏……………耶律阿穆爾 二九

諫伐高麗奏統和二十八年……………蕭迪里 三〇

省罷成役奏重熙四年……………耶律唐古 三〇

高麗遣殿中少監崔廷嘏來奏狀重熙六年……………三〇

請不納元昊降奏重熙十三年……………蕭 惠 三一

力諫天祚疏保大四年……………德 宗 三一

伊遜請賜牧地奏太康元年……………耶律音濟 三三

宋延慶殿奏天慶五年……………李良嗣 三三

上書

耶律華格將罷兵上書開泰二年……………耶律世良 三四

上皇帝書……………馬保忠 三四

請分部治準布上書……………簫托雲 三五

銘

靜安寺碑銘咸雍六年……………耶律興公 三五

興中府安德州翺建靈巖寺碑銘乾統八年……………耶律劼 四一

靈感寺舍利塔碑銘天慶六年……………張嗣初 四六

序

續一切經音義序……………沙希麟 五〇

星命秘訣自序……………耶律純 五六

卷三

書

封箭諭高麗將書統和二十八年……………望宗 五九

致宋帝書重熙十一年……………興宗 五九

與宋誓書重熙十一年……………興宗 六一

將伐夏遣使告宋書重熙十三年……………興宗 六三

賜沙門郎思孝書重熙十七年.....興宗 六三

使涿州遣宋書大安七年.....道宗 六四

遣蕭德崇等為夏人議和使宋國書壽隆五年.....道宗 六四

遣回鶻王必里克書.....德宗 六五

密遣人至雄州投蠟彈文天慶五年.....李良嗣 六五

與李處溫使為遼內應書.....李良嗣 六六

李處溫使李爽回書.....李爽 六九

與李爽劉範馬柔吉等書.....李良嗣 七〇

卷四

劄子

遣王繼忠和宋劄子.....七三

文

手書耶律都沁衣裾文.....聖宗 七三

拜特哩袞戎族人文重熙二十二年.....耶律義先 七四

諭

徙蕭惟信爲燕趙國王傳諭重熙十五年…………… 興宗 七四

使韓詢持詔諭平州保大二年…………… 張穀 七五

疏宰相左企弓等十罪榜諭保大三年…………… 張穀 七五

牒

至高麗遠城興化鎮牒重熙四年…………… 張穀 七七

狀

詣宋安撫司納土狀保大三年…………… 張穀 七八

對

道宗問邊事對咸雍八年…………… 耶律佛德 七九

辭絕婚對…………… 耶律努婁蕭氏 七九

議

謀取三關議重熙六年…………… 蕭惠 八〇

謀取三關議…………… 蕭孝穆 八〇

碑碣

法華寺重修募緣碣

張希顏

八一

塔記

釋迦定光二佛舍利塔記重熙十五年

門慧材

八二

幢記

佛頂尊勝陀羅尼石幢記開泰二年

王桂

八五

京西戒壇寺陀羅尼幢並記太康三年

沙裕經

八六

惠州李祐墓幢記天慶三年

李忠益

八七

誓文

卽位東征祭天樹旗誓衆文康國元年

德宗

八九

祭文

遣耶律信等勅祭高麗王文宗文太康十年

八九

遣耶律信等勅祭高麗王順宗文太康十年

九〇

雜著

營衛舊志……………耶律儼 九一

卷五

補遺

詔

賜回空國師詔開泰二年……………九三

戒公事造次詔太平十年……………九三

征女真詔天慶五年……………九四

制

遺制會同十一年……………太宗 九四

諭

詣漢軍行營宣諭天慶五年……………韓汝誨 九四

表

遣使詣後唐上表天顯二年……………盧文進 九五

書

復晉求修舊好書會同八年……………太宗 九六

使遣樂壽監軍王巒請舉城內附書會同十年……………太宗 九七

復後晉杜威書會同十年……………趙延壽 九七

致宋帝書重熙十年……………興宗 九八

致宋仁宗書重熙十三年……………興宗 九八

又書重熙十四年……………興宗 九九

再報西征書重熙十八年……………興宗 九九

遣晉太后書……………太宗 九九

報晉少帝書……………太宗 一〇〇

瀛州大將遺晉蠟書……………太宗 一〇〇

上京回書……………李良嗣 一〇〇

檄

暴晉出帝之惡於天下檄……………太宗 一〇一

雜著

伴宋使紀程統和二十六年.....李詢 一〇一

又.....劉經 一〇二

又.....牛營 一〇三

卷六

作者考.....一〇五

卷七

逸目考.....一二七

遼史藝文志補證一卷.....一三五

遼文萃目次終

遼文萃 目次

遼文萃卷一

詩

以司空大師不肯賦詩以詩挑之

興宗

爲避綺吟不肯吟既吟何必味真心吾師如此過形外弟子爭能識淺

深

遼東行部志
引海山文集

和詩二首

沙門 郎思孝

爲愧荒疏不敢吟不吟恐忤帝王心本吟出世不吟意以此來批見過

深

又

天子天才已善吟那堪二相更同心直饒萬國猶難敵一智寧當三智

深

又

天安節題松鶴圖

門沙 郎思孝

千載鶴棲萬歲松霜翎一點碧枝中四時有變此無變願與吾皇聖壽

同

又

按金王寂遼東行部志曰得海山文集乃遼司空大師居覺花島海雲寺時所製也故目其集曰海山師姓郎名思孝蚤年舉進士第更歷郡縣一日厭棄塵俗祝髮被緇已而行業超絕名動天下當遼興宗時尊崇佛教自國主以下親王貴主皆師之嘗錫師號曰崇祿大夫守司空輔國大師凡上章表名而不臣興宗每萬機之暇與師對榻以師不肯作詩先以詩挑之云云師和之云云二相謂杜令公劉

侍中也後題松鶴圖云云

詔

免黥詔

重熙二年

犯罪而悔過自新者亦有可用之人一黥其面終身爲辱朕甚憫焉後
犯終身徒者止刺頸奴婢犯逃若盜其主物主無得擅黥其面刺臂及
頸者聽犯竊盜者初刺右臂再刺左三刺頸之右四刺左至於五則處

死

刑法志下

使高麗崔延嘏還齋詔

重熙七年

卿世稟聲朔歲奉梯航近覽奉章備觀誠懇嘉歎良多勉思永圖無曠

述職

東國通鑑

使高麗金元冲還齋詔

重熙七年

省所上表夏季起居事具悉卿挺身方略善撫世封得愛戴於東韓盡傾虔於北關屬歆蒸之在候馳章奏以問安嘉矚之懷每興增切

高麗史

又詔

省所上表謝恩令朝貢并進捧金吸瓶銀藥瓶幘頭紗紵布貢平布腦原茶大紙細墨龍鬚荳席等事具悉卿權司國宇欽奉朝廷昨差使人遠敷忠款述累世傾輸之節達近年阻限之由乞重效於梯航願永爲於藩翰載觀恭順尋示允從煩致謝章仍陳貢篚顧閱之際媿歎良深

高麗史

又詔

省所奏已行用重熙年號事具悉卿昨者乞修朝貢尋允奉陳使介回旋知我紀年之號書文稟用見其向日之誠省覽歎嘉不忘於意

高麗史

遣大理卿韓保衡賜高麗王詔

重熙八年

地控東域星環北辰愈堅奉上之心宜舉策勳之典遐馳使馭載啓王封是謂恩榮所宜祇荷今差大理卿韓保衡往彼賜卿官告一通敕牒一道到可祇受官告曰朕體天洪覆酌古通規內則推皇家懷遠之誠外則付王國專征之柄航棧不可以輕入車書不可以妄同庶及羣雄永全大義與其軒習弧矢而夏陳千戚曷若周分藩屏而漢誓山河其有業重桓文望高辰卜紹祖宗之云始革先王之不恭貢土疆而廣我提封奉玉帛而首諸方面安和是務忠肅爲容宜舉彝章特敷寵數權

知高麗國王王亨奇姿玉瑩偉量淵溥齧丘聳架海之雄旁鍾秀拔龍
宿挺麗天之采俯降精英而自守名區大開霸府動靜克遵於典則寐
興能制於驕矜千里甸畿先臻富庶一方民俗咸荷恩榮成弈世之令
名得殿邦之異略是用專馳駢轡遠降龍綸玄菟全封榮加於一字溫
貂峻秩兼示於三師馭貴崇階襄功懿號廣疏井賦茂獎忠庸於戲星
辰在拱北之躔則爲合度江漢得朝宗之路乃是安流勉服斯言勿煩
常訓可授開府儀同三司守太保兼侍中上柱國高麗國王食邑七千

戶食實封一千戶仍賜輸忠保義奉國六字功臣

高麗史

遣王永言賜高麗王詔

重熙十一年

朕以關南十縣我國舊基將舉兵師議復土壤宋朝累馳專介懇發重

言定於舊貢銀絹三十萬兩匹外每年別納金繪之儀用代賦與之物再論盟約永卜歡和其諸道兵馬等優給蠲免賦調竝已放還本部夫何眇躬成此美事今文武百辟中外庶官屢拜封章載稽典故謂予有元功大略加予以懿號鴻名不獲固辭勉依羣請已撰定十一月三日兩宮竝行大禮卿稱藩事上望闕輸忠遐想聞知必增慶悅今差禮部

尙書王永言齎詔往彼示諭

高麗史

遣蕭愼微等賜高麗王詔

重熙十二年

朕猥以眇德嗣受丕圖賴六聖之垂休致八方之咸乂近從羣懇祇受鴻名凡在照臨畢均慶賞卿世欽聲朔地襲土茅航海罄述職之儀事大竭爲臣之節屬陳鉅禮載舉彝章特推進秩之恩併茂疇庸之數今

遣使左監門衛上將軍蕭愼微使副尙書禮部侍郎韓紹文持節備禮

冊命并賜車服冠劍印綬及國信等物具如別錄到可祇受

高麗史

復高麗王請停榷場詔

大
安
四
年

屢抗封章請停榷場諒惟細故詎假繁辭邇議便宜況未創置務從安

帖以盡傾輸釋乃深疑體予至意

東國通鑑

秦晉王耶律淳立赦詔

保大三年
改建福元年
併

自我烈祖肇創造之功至於太宗恢廓清之業故得奄有區夏全付子

孫邈後纂承罔不祇肅傳二百祀之逾遠得億兆人之底寧蓋太平或

弛於細娛

寫本作
細防

而內治多遺於外患以是邊鄙生茲寇讎漸爲蔓草

之難圖公肆長蛇之薦食敢來問鼎直欲爭衡敵壘尙遙王師自潰兵

非不銳事止失和故使乘輿越在草莽地隔不果相越旬餘莫知所歸
三邊蕩搖百姓震懾懼不相保謂將疇依咸云六合爲家不可一日無
主共戴眇質用登至尊皆出素衷尙慙否德又念與其長天下之亂曷
若復我家之功苟其宗社不移亦曰神靈所望勢不克避理當共知嗚
呼朕以久處王藩歷更政務寫本作政路凡民疾苦與事便宜靡所不知亦
曾熟慮自今以後革弊爲先所期俾四海用寧不敢以萬乘爲樂敢告

遠邇予不食言

北盟會編五

按淳後世稱北遼附天祚紀保大二年天祚入夾山官屬勸進遂卽
位百官上號天錫皇帝諡曰孝章皇帝廟號宣宗

遙降天祚帝爲湘陰王詔

保大年三年

大道既隱不行揖遜之風皇天無私自宥廢興之數事賞得效人難力
爲朕幼保青宮長歸朱邸雖曰人情之久繫誰云神器之可求欲避周
公之嫌未忘季札之節柰何一旦之無主致使四海之求君推戴四從
詎歌百和不敢墜祖宗之業勉與攬帝王之權實懼纂圖之爲難尙思
復辟之可待近得羣臣之奏槩陳前主之非所謂懷諫矜能比頑棄德
躁動靡常節平居無話言室家之杼軸盡空更恣淫費宗廟之衣冠見
毀不輟常收漢子之戮實無名倣妻之亂孰可忍加以權臣壅隔政事
糾紛左右離心遐邇解體訖無悛悟以致播遷伊慙自貽大勢已去是
謂辜四海之望安得冒一人之稱宜削徽名用昭否德方朕心之牽愛
尙不忍從柰羣議之大公正復見請勉循故事用降新封可降封爲湘

陰王嗚呼命不于常事非得已豈予小子敢專位號之尊蓋徇衆心以

爲社稷之計凡在聞聽體予至懷

契丹國志

按此與北盟會編異權臣四句會編無之另錄於後

大道既隱不行揖遜之風皇天無私自廢興之數事易得效人難爲力朕幼保青宮長歸朱邸雖爲人情之久係誰云神器之可求欲避周公之嫌未忘季札之節柰何一旦之無主致使兆民之求君推戴四從謳歌百和不敢負祖宗之業勉與攬帝王之權尙慮纂圖之爲難庶期復辟之有待近得羣臣之奏槩陳前主之非所謂懷諫矜能比頑棄德躁動靡常節平居無話言室家之杼軸成空更滋浮費陵廟之衣冠見毀不輟常田漢嫡之戮實出無名佞妻之亂尤不可記迄無悛改以至

播遷伊戚自貽大勢已去是謂絕四海之望安得冒一人之稱宜削徽名用昭否德方朕心之牽愛尙不忍從柰羣議之爲公正復見請是以勦稽故事用降新封嗚呼進退惟公廢興有義豈予小子欲專位號之崇蓋徇衆心以爲社稷之計凡在聞聽體朕意焉

北盟會編五

天祚聞耶律淳卒詔

德興元年

天命至大不可以力回神器至公未聞以智取古今定論歷數難移是以聖人戒於盜竊故秦晉國王耶律淳九族之內推爲叔父之尊百官之中未有人臣之重趨朝不拜文印不名嘗降璽書別頒金券日隆恩禮朕實推崇衆所共知無負於爾比因寇亂遂肆窺覷外徒有周公之儀內實稔子帶之惡不顧大義欲償初心任用小人謀危大寶僭稱帝

號私授天官指斥乘輿僞造符寶輕發文字肆赦改元以屠沽商賈爲
翌戴之臣以佞媚狙詐處清密之任不踰累月便至臺階刑獄濫寃紀
綱紊亂恣縱將士剽掠州城致我燕人陷於塗炭天方悔過神不助奸
視息偷存未及百日一身殄滅絕嗣覆家人鬼所讐取笑天下而又輒
申遺令擅建長秋妄委婦人專行僞命其逆臣李處溫父子同恣貪婪
殺戮無辜助爲不法衆心離散立致分崩狼狽荒迷容身無地罪誠難
貸令在必行假其餘生庸示寬大據耶律淳大爲不道棄義負恩攘扈
祖宗朕不敢赦應所授官爵封號盡行削奪并妻蕭氏亦降爲庶人仍
改姓虺氏外據皇太叔并妃別無關礙更不施行其封爵懿號一切仍
舊嗚呼仰觀天意俯察輿情勉而行之朕亦不忍且仲尼作春秋亂臣

賊子懼後之爲臣子者可不慎哉

北盟會編九

改元與百官詔

延慶元年

朕與卿等行三萬里跋涉沙漠夙夜艱勤賴祖宗之福卿等之力冒登

天位爾祖爾父宜加恤典共享尊榮

天祥紀

冊

立石敬瑭爲大晉皇帝冊

天顯九年

維天顯九年歲次丙申十一月丙戌朔十二日丁酉大契丹皇帝若曰

於戲元氣肇開樹之以君天命不恆人輔惟德故商政衰而周道盛秦

德亂而漢圖昌人事天心古今靡異咨爾子晉王神鍾睿哲天贊英雄

叶夢日以儲祥應澄河而啓運迨事數帝歷試諸艱武略文經迺由天

縱忠規孝節固自生知猥以眇躬奄有北土暨明宗之享國也與我先
哲王保奉明契所期子孫順承忠難相濟丹書未泯白日難欺顧予纂
承匪敢失墜爾惟近戚實係本枝所以予視爾若子爾待予猶父也朕
昨以獨夫從珂本非公族竊據寶圖棄義忘恩逆天暴物誅翦骨肉離
閒忠良聽任矯諛威虐黎獻華夷震悚內外崩離知爾無辜爲彼致害
敢徵衆旅來逼嚴城雖併吞之志甚堅而幽顯之情何負達予聞聽深
激憤驚乃命興師爲爾除患親提萬旅遠殄羣兇但赴急艱罔辭艱險
果見神祇助順卿士協謀旗一麾而棄甲平山鼓三作而殪尸徧野雖
以遂予本志快彼羣心將期稅駕金河班師玉塞矧今中原無主四海
未寧茫茫生民若墜塗炭況萬幾不可以暫廢大寶不可以久虛拯溺

救焚當在此日爾有庇民之德格于上下爾有勘難之勳光于區宇爾有無私之行通乎神明爾有不言之信彰乎兆庶予懋乃德嘉乃丕績天之歷數在爾躬是用命爾當踐皇極仍以爾自茲并土首建義旗宜以國號曰晉朕永與爲父子之邦保山河之誓於戲補百王之闕禮行茲盛典成千載之大義遂我初心爾其永保兆民勉持一德慎乃有位允執厥中亦惟無疆之休其誠之哉

舊五代史晉書高祖紀

按文存止據四夷附錄咨爾子晉王予視爾猶子爾視予猶父十五字遼史太宗紀十一年冬十月甲子封敬塘爲晉王十一月丁酉册敬塘爲大晉皇帝舊五代史後唐清泰三年十一月契丹主會晉帝于營中曰眞國主也欲徇蕃漢羣議册爾爲天子命築壇於晉陽城

冊文如右

遣蕭愼微等賜高麗王冊

重熙十年

朕膺穹旻之寄紹祖宗之基四表歸仁偃靈旗而定霸百官考禮鏤寶冊以加尊遐眷帝臣踐開國社航海之誠靡怠帶河之誓愈堅屬覃慶之在辰宜頒恩而及遠式遵徽典特舉寵章咨爾輸忠保義奉國功臣開府儀同三司守太保兼侍中上柱國高麗國王食邑七千戶食實封一千戶王亨英哲閒時仁慈纘服張皇土宇互日域以分圻尊獎天朝仰宸居而送款戴舜樹彌成之業匡周規夾輔之勳化被蒼隅聲敷青猷朕昨戒嚴駕巡撫京畿邦尹展肆覲之儀都人契來蘇之望干戈不試獄市惟齊羣方則慕義向風交馳玉帛鄰國則畏威懷德增納金縑

聿臻累洽之期適亨虛名之冊是推皇澤首及王藩進絕席之崇資正
專車之峻秩原田益賦美號褒功是用遣使蕭愼微使副韓紹文持節
備禮冊命汝爲守太傅兼中書令加食邑三千戶食實封三百戶仍賜
同德致理四字功臣散官勳爵如故於戲守君子國冠諸侯王論道而
爲周師奮庸而登漢相維堅臣節以答皇家享富貴於昌時傳功名於
長世輝流竹素永惟欽哉

高麗
史

遣宋璘賜高麗王冊

重熙十
六年

眷乃馬韓之地素稱龍節之邦代襲王封品高人爵分頒金盃表榮觀
於諸侯申錫彤茲得顯征於四履爰屬傑時之器允膺纘服之權載歷
臧時式均徽典權知高麗國王事王徽應基運之敷鍾英異之靈天麟

迴首於龜龍遙明嘉瑞日觀徧崇於嵩華夙煥函經負文武之全材識
忠孝之大本粵自勝衣有始構室推良靜守貞純動循禮樂慕桓文之
霸業精衛霍之兵符富厥令圖稔茲淑會泊帥臣之告闕亟藩國之歸
尊而能惠洽一方情協羣望因露章而斯暨致寵數以難稽是宜用顯
被於紫綸俾特建於元社倚爲左相峻陟三卿超躋馭貴之階優賜褒
宮之號盈疏實賦劇轉清勳於戲周天王之重非熊止遙分於齊壤漢
高祖之刑白馬仍納約於劉宗順考古先罕偕恩禮用卜悠長之祚愈
堅匡合之誠勉佩訓言仰迪神祐可特授開府儀同三司守太保兼侍
中上柱國封高麗國王食邑七千戶食實封一千戶兼賜匡時致理竭

節功臣之號

高麗史

金主爲東懷國皇帝册

天慶九年

朕對天地之閔休荷祖宗之不業九州四海咸在統臨一日萬幾敢忘
任重宵衣爲事嗣服宅心眷惟肅慎之區實介扶餘之俗土濱巨浸材
布中區惟有山川之名承其祖父之緒碧雲袤野固須挺於渠材皓雪
飛箱疇不推於絕駕章封屢報誠意交孚載念遙芬宜膺多譏嗚呼義
敦友睦地列豐腴惟信可以待人惟寬可以馴物戒只戒只式孚於

休

謀夏
錄

勅

賜高麗將勅

統和二十八年

朕以前王誦紹其祖服爲我藩臣捍禦封陲忽被姦凶所害朕將精銳

來討罪人其餘脅從皆與原免况汝等受前王撫綏之惠知歷代順逆

之由當體朕懷無貽後悔

東國通鑑

甲午以錦衣銀器等物賜鎮將勅

統和二十八年

省所上表奏具悉朕纂承五聖臨御萬邦忠良則必示旌褒凶逆則須行誅伐以康兆弑其故主挾彼幼君轉恣姦豪大示威福故親行誅伐已臨近境比頒綸旨式示招懷遽覽封章未聞歸款汝等必知逆順豈可助謀於逆黨不思雪憤於前王宜顧安危預分禍福

東國通鑑

將柴册遣使勅并羣臣對

先帝升遐有伯叔父兄在當選賢者冲人不德何以爲謀羣臣對曰臣等以先帝厚恩陛下明德咸願盡心敢有他圖皇帝令曰必從汝等所

願我將信明賞罰爾有功陟而任之爾有罪黜而棄之若聽朕命則當
謨之僉曰唯帝命是從

禮志

遼文萃卷二

表

請立太祖表

耶律赫魯

聞裕悅之生也神光屬天異香盈幄夢受神誨龍錫金佩天道無私必
應有德我國削弱齟齬於鄰部日久以故生聖人以興起之汗知天意
故有是命且約尼九營綦布非無可立者小大臣民屬心裕悅天也昔
者裕悅伯父實嚕嘗曰吾猶蛇兒猶龍也天時人事幾不可失

本傳

高麗李守和回表

統和二
十八年

臣等昨奉詔泥輒陳心石望賜泣辜之惠切祈解網之仁

東國
通鑑

高麗朴寅亮陳情表

壽隆二年

普天之下既莫非王土王臣尺地之餘何必曰我疆我理又曰歸汝陽

之舊田撫綏敝邑回長沙之拙袖抃舞昌辰

東國通鑑

按東鑑九月高麗右僕射參知政事朴寅亮卒寅亮文詞雅麗宋熙寧中與金覲使宋所著尺牘表狀及題詠宋人稱之至刊二公詩文號小華集遼嘗欲過鴨綠江爲界寅亮修陳情表云遼帝覽之寢其

議卒謚文烈

以涿州降宋表

保大年

郭藥師

臣聞天下有道則臣民非后何戴是謂天人之極致豈非古今之常情百姓係心素憤北夷之怨一時翹喜咸歸中國之明臣躬領州縣僚屬

豪右子弟官員僧道軍吏百姓等奮臂約一萬人斬首至三千級永屬

後蘇之望舉懷賴慶之思

北盟會編九
引封氏編年

按燕雲奉使錄所載有異更列於後

伏聞蕃漢之人實爲異類羊狼之伍不可同居自生夷貉之鄉未被衣冠之化常思戴日何啻望霓昨天祚皇帝怠棄變輿越在草莽萬姓無依棲之地五都有板蕩之危雖宣宗嗣國旋至奄忽女后攝政尤難撫綏誠天命之有歸非人力之能致臣藥師等雖屬多難莫生異心蓋所居父母之邦不可廢臣子之節今契丹自爲戎首竊稔奸謀燔燒我里廬虔劉我士女報之以怨撫乃以仇臣藥師等以是競思戴舜以同心不可助桀而爲虐今將所管押馬步軍用申懇悃伏願皇帝陛下副茲

多望憫此哀鳴時開天地之恩許入風雲之會實所願也非敢望焉臣藥師等無任瞻天慕聖激切屏營之至謹奉表以聞臣藥師等誠惶誠恐稽首頓首謹言宣和四年九月十日遼國常勝軍都管押諸衛上將軍臣郭藥師等表奏

又引燕雲奉使錄

蕭太后遣使至宋納款稱臣表

總興元年

遼國太后妾蕭氏言蓋聞溟海納汙繫衆流而畢會太陽舒照豈懼火以猶飛方天下之大同故聖人之有作拊心悼往飲泣陳辭伏念妾先世乘唐晉之季年割燕雲之外地暨逢聖運已受齊盟義篤一家誓傳百禩孰謂天心改卜國步多艱先王遇板蕩之餘勵興復之志始歷推戴奄致淪殂爰屬惇嫠俾續禴祀常欲引干戈而自衛與社稷以偕亡

伏念生靈重罹塗炭與其陷執迷之咎曷若爲奉上之勤伏遇皇帝陛下四海宅心兆人歸命敷文德以柔遠奮武烈以訓時必將拯救黎元混一區宇仰承嚴命敢稽歸款之誠庶保餘生猶荷永綏之惠今差永昌宮使蕭容乾文閣直學士韓昉等詣闕奉表陳奏以聞臣妾蕭氏誠惶誠恐稽首頓首謹言德興元年九月十日遼國太后臣妾蕭氏上表

北盟會編十
引封氏編年

僞爲夏元昊歸款表

元昊曩自先朝求爲鉅援據一方之裂壤迨二世以襲封梟音易變犬態多端忘牢象之深恩肆狂悖之兇性擅誘邊俗巧謀歡鄰罪旣貫盈理當難赦是用躬驅銳旅往覆危巢方邇賊庭乞修覲禮

儒林
公臨

高麗王謝表

中國三甲子方得一朝大邦一周天每修六貢

文獻通考
四裔考

奏疏

左右軍國要務奏

會同
八年

軍國之務愛民爲本民富則兵足兵足則國彊

食貨
志上

討晉帝石重貴杜重威奏

耶律圖勒錦

臣愚竊以爲陛下樂於安逸則謹守四境可也旣欲擴大疆守出師遠
攻詎能無慮聖慮若中路而止適爲賊利則必陷南京夷屬邑若此則
爭戰未已吾民無奠枕之期矣且彼步我騎何慮不克況漢人足力弱
而行緩如選輕銳騎先絕其餉道則事蔑不濟矣

本傳

募人穫奏

乾亨五年

韓德讓

兵後逋民棄業禾稼棲畝募人穫之以半給穫者

本傳

請復民租奏

乾亨五年

室昉

山西諸州給軍興民力凋敝田穀多躡於邊兵請復今年租

本傳

農事奏

統和

耶律昭

西北之衆每歲農時一夫偵候一夫治公田二夫給糶官之役當時沿

邊各置屯田戍兵易田積穀以給軍饗

食貨志

諫濫刑

耶律阿穆爾

夫兄弟雖曰同胞賦性各異一行逆謀雖不與知輒坐以法是刑及無

罪也自今雖同居兄弟不知情者免連坐

本傳

諫伐高麗疏

統和二
十八年

蕭迪里

國家連年征討士卒抗敵況陛下在諒陰年穀不登創痍未復烏夷小國城壘完固勝不爲武萬一失利恐貽後悔不如遣一介之使往問其故彼若伏罪則已不然俟服除歲豐舉兵未晚

本傳

省罷戍役疏

重熙
四年

耶律唐古

自建哈屯城已來西蕃數爲邊患每煩遠戍歲月旣久國力耗竭不若復守故疆省罷戍役

本傳

高麗遣殿中少監崔延嘏來奏狀

重熙
六年

當國伏自前皇太后皇帝降冊命以頒宣疏土封而定分但茲東域仰戴北辰連年不絕以勤王遞代相傳而述職頃以先臣亡兄纂承祖業

歸附皇朝聞一德之君臨新頒慶澤將兩條之公事專奏宸聰未垂俞允之恩轉積遲疑之慮自從曩歲以到今辰雖迭換於炎涼且久停於朝貢近蒙睿旨頗愜鄙懷謹當遵太后之遺言固爲藩屏撫小邦之弊俗虔奉闕庭更從文軌以輸誠永效梯航而展禮

東國通鑑

請不納元昊降疏

重熙十三年

蕭惠

元昊忘奕世恩萌姦計車駕親臨不盡歸所掠天誘其衷使彼來迎天與不圖後悔何及

本傳

力諫天祚疏

保大四年

德宗

自金人初陷長春遼陽則車駕不幸廣平淀而都中京及陷上京則都燕山及陷中京則幸雲中自雲中而播遷夾山向以全師不謀戰備使

舉國漢地皆爲金有國勢至此而方求戰非計也當養兵待時而動不

可輕舉

天祚紀三

按亡遼錄有異特另錄於後

自金人初陷長春遼陽兩路則車駕幸廣平甸而都中京及陷上京則都燕山及陷中京則都雲中及陷雲中則奔夾山向以全師不謀戰備以至舉國漢地全爲金人所有國勢微弱至此而方求戰非計也當養

兵待時而動不可輕舉

亡遼錄

按惜此諫天祚斥而不從率諸軍乘金人歸遇金人戰敗遂致二百

三十餘年之祚亡焉忽焉而遼滅已滿然居士集懷古詩注曰大石

林牙遼之宗臣挈衆而亡不滿二十年克西域數十國幅員數萬里

傳數主凡百餘年頗尙文教西域至今思之廟號德宗又按天祚紀稱此諫天祚不從達實遂殺伊實及博勒和置北南面官屬自立爲王遂所部西去西遼事附見天祚紀耶律所注卽此事又西遷後所歷諸部考詳俊輯西遼史

伊遜請賜牧地奏

太康元年

耶律音濟

今牧地褊隘畜不蕃息豈可分賜臣下

本傳

宋延慶殿奏

天慶五年

李良嗣

臣國主天祚皇帝耽酒嗜音禽色俱荒斥逐忠良任用羣小遠近生靈悉被苛政比年以來有女真阿骨打者知天祚失德用兵累年攻陷州縣加之潰卒尋爲內患萬民罹苦遼國必亡願陛下念舊民遭塗炭之

苦復中國往昔之疆代天譴責以順伐逆王師一出必壺漿來迎願陛下速行薄伐脫或後時恐爲女真得志蓋先動則制人後動則制於人

北盟會篇一引
封有功亂年

上書

耶律華格將罷兵上書

開泰二年

耶律世良

華格以爲無事而還不思師老糧乏敵人已去焉能久守若益兵可克

也

本傳

上皇帝書

馬保忠

疆天下者儒道弱天下者吏道今之授官大率吏而不儒崇儒道則鄉黨之行修修德行則冠冕之緒崇自今其有非聖帝明王孔孟聖賢之

教者望下明詔痛禁絕之

契丹國志

請分部治準布上書

蕭托雲

準布今已服化宜各分部治爲節度使

傳本

銘

靜安寺碑銘

成雍六年

耶律興公

五都錯峙帝宅尊乎中土則大定之分甲天下焉三教並化皇國崇乎至道則梵刹之制布域中焉苟或就風雨交會之邦關龍象棲遊之境法興地□可得而言若夫迦文示寂之餘招提奉像之設締構獲其善報供事植其勝因則歷世建寺之文道之常矣今略而不書但敘茲地權輿之事今□太祖天皇帝總百年之正統開萬世之寶□公族衍盛

枝葉芬茂故南大□諱景卽帝之房孫也故左金吾衛上將軍諱寧卽
公之長子也故檢校太師左千牛衛上將軍知涿州軍州事諱昌允卽
金吾之子也協輔王室許國之勳卽著並啓土宇裂壤之錫斯在天邑
之北僅餘百里則公之故地焉嵐凝翠疊曰佛山山足民屋聚居若郡
邑之大曰義州今蘭陵郡夫人蕭氏主之卽太師公之妻也太師毓慶
戚閉諱心□佛乘車暇日以有思□憑高而肆望延岡委迤環甲第以
遠周孤巘崔嵬枕閑田而下廓遂卜此地肇開勝藍雖經始之謀有先
而考終之期奄速夫人抱未亡之永恨緝已墜之遺功發大勇猛之勝
心資不思議之神力由是斲險爲垣堙卑就寬長木下而翠色移貞礎
出而雲光破風斤疊運遠谷回音雷杵高相寒泉交響金者冶甌者陶

壁者圻材者斲彩者繪隅者塗衆工銜勤百事偕作起於清寧八年庚子歲成於咸雍八年壬子歲辰次一周元功告畢中其殿則曼荼羅□泊過未七佛明□高僧之像在焉雙其樓則修拓路藏泊聖賢諸傳章疏鈔記之部在焉遠侔東土則震隅設繪者□樂師如來近擬西方則兌位表形者□彌陀善逝至於十方寶相五佛粹容皆極其端嚴曲盡于妙□凡法堂僧宇厨室困房泊廐庫客次靡不備有皇皇焉信解脫之闡域功德之叢林者也待其山月初霽巖雲半開飛搖金碧之輝動盪烟霞之色回簷落影暑氣由是夏銷鬪櫛排空殘照于焉夕挂輪奐之盛可勝道哉先是□夫人之長男輟供職于行朝委都征于雜務得佛牙一顆大踰方寸牙上得舍利七百餘粒若珂□之質寶燿光射疑

國兵之未分豈灰色交訝海龍之反施夫人且曰遺□蘊安葬是崇苟非堅固必貽後悔旁出乾位有孤峯嶸焉碧石嶽峯固□巔末遂募工鑿鑿深逾數丈石之開有文若花葉紛敷之狀厝窆之日衆數百人約而集有祥雲華地彌覆其上逮至吉時則陽景舒光不差晷刻葬已□合郁郁如初遠近見者咸警異之時咸雍五年九月九日也明年十一月既望□前後共三夜光氣燭天見者數千人復就石龕之前架一小殿則三聖八像阿羅漢之容悉皆具焉嗚呼智者始謀爲利斯永善人作事獲福自多每至□暘谷欲暝驥輪將墜舍利之影落覆邱塋則太師公之遺墟承蔭其下若非巧入心匠神開志端則揆事之長孰能與於此凡巨細之費餘於二萬緡□□□之績就於十二載工徒之役

算日酬庸驅籍一毫不取皆賢夫人醫廩節減衣御之爲也寺旣成必假衆以居之遂延僧四十人有講則復益二□□僧旣居必資食以給之遂施地三千頃粟一萬石錢二千貫人五十戶牛五十頭馬四十匹以爲供億之本咸雍六年冬事達難聽上用嘉之勅賜曰靜安寺獎勤意而賁山藍也恭維夫人以慈□接物類以沖澹卻世紛斷而後行力致者皆爲軌法仁以成性身至則自是道場遂能挺不退之至誠集無上之良福與夫桂陽追愛起崇義于隋朝陳妃施財造逮元于晉代固可同年而語矣夫人二子長曰佶禮賓副使銀青崇祿大夫檢校右散騎常侍同知利州事兼部內巡檢次曰特里德皆根乎善本協彼勝心宏助之功詎能詳述大哉敞阿蘭若之靜姿像薄迦梵之遺形所祈

者聖祚垂鴻固蘿圖于浩劫羣靈護佑趣花藏于他生又何止延九族
之修齡薦三代之冥福而已哉興公才非半古識不照鄰自服爲吏之
勞頗滯攻文之思茲承勤請未易固辭據實寶坊旣盡一時之勝槩□
英珉篆願垂千古之休聲銘曰神邑浩壤六街碁布雖敝釋宮不無重
圯□峯幽寂萬載□閑雖開禪寶是勞躋攀帝輦□賒川岐造能關勝
場乃得中道都會百里嵐光數程山參而□岡橫如平□夫人上茲
佛地結構瑰琦規模壯麗正殿踰立危樓對森烟梵凝碧朱甍疊陰寶
像中存□□攸見月伴高佛雲□□□孰□□土□開□□□祐睿君
□□含識□庇我華宗資乎幽冥承德府志二十

按靜安寺在大寧故城南十家兒村遼咸雍開蘭陵郡蕭夫人建碑

字漫漶不可讀寺址尙存見熱河志今寺在大寧城南里許有古寺
基址周圍數十畝碑尙存額書大遼義州大橫帳蘭陵夫人蕭氏創
建靜安寺碑

興中府安德州勅建靈巖寺碑銘

并序
統八年

耶律劭

伏聞大雄示化肇興五竺之邦像法定期實屬千年之會漸流通于震
且迴超越于古初三乘遞行一雨溥潤我國家右文敷治假革濟時繇
敷路以取英翹振儒風於當代闡二宗而尙禪定傳佛燈於有生廣樹
仁祠大宏慈蔭安德州靈巖寺者北連龍岫前俯郡城溪壑幽深峯巒
掩映天然勝槩斗絕於一方宛爾道場廓開於十地初統和中石山主
僧可觀與其同志幼爲縣吏各負逋租亡命此山共逃箠楚後偕追捕

同付獄中數日幽囚桎梏自解尋免徵錄因遂出家卜築結菴專精戒律壽考遷逝靈應舛蠶太平五年復有邑里趙延貞王承遂張瑩焦慶等三十有三人狀施烽臺山四面隙地以廣布金之淨域遠模靈鷲之風規增大給孤之園益茂耆陀之樹年禩寢久徒衆漸隆重和初元有郡人雄武軍節度使太原王公育與邑人尹節高聳等禮請悟開上人住持經始營葺僧衆蠲附工徒子來殿宇疑爾以有年錢穀豐衍而不匱果畢能事全付後人僧伽實繁悉萃六和之淨侶達摩無覩固乏三藏之秘文重和二十二年有寺僧潛奧與悟開上人鳩集淨財締結信士與邑人尹節李敬張士禹高聳等購經一藏用廣流通二十四年建九聖殿以龕置焉繪像煒煜而嶽峙內藏巖業而雲矗經律論學揚法

海之驚瀾上中懷根逗塵機於來哲清寧四載特賜淨覺之名咸雍六年復錫靈巖之號居然闕邃迴出塵表故得水雲上十龍像名流覽境界之清虛駐瓶錫而棲止有閩山懺悔守司徒通圓慈行大師志福遊憩於此以其闕鐘杵之音失晨昏之警飛奏爲請天旨下俞徵良冶于遠方貿精銅于異域鑪橐一鼓大器告成逸韻疊擊而豐隆林薄四震於幽邈設簷爲飾構樓以懸壽昌初元歲次己亥復建大殿以敝法筵楹柱撐空椽桷蔽日輪奐克成於大壯清淨特備於寶坊羣峰巒岼而繚若垣墻諸塔聳峻而勢同湧現禪房自通於幽處講座屢雨其天花今天子卽位之二年有守太師通圓輔國大師法頤者久藹人天之譽蔚爲帝王之師衆僧懇請遂居是寺人對境以心冥地因居而名著師

因精選道行得長老惠敬付以寺事提綜不倦勤瘁歷年建置悉覩於

周圓儲蓄益臻於羨積劬恭膺詔檢恪守郡符志慕佛乘誓求法印時

因暇日屢叩禪關有清行大德賜紫沙門奉檀寺主沙門行柔等語其

權輿見託紀述學慚博雅夢無白鳳之奇詞愧疎蕪語乏黃絹之句牢

讓不獲謹爲銘詞銘曰佛承廣運慧日映時法膺象季溥建仁祠世蒙

誘導教被方維福濟含識學法有爲偉矣靈巖豁然林壑斗遠流俗高

視寥廓境淨心冥解脫纏縛以致名流茲焉棲泊鐘梵時警薰修有常

覺林並茂禪院滋芳瀉山圭峯聊可比方居者得趣世諦頓忘息乃塵

紛味茲幽閔清淨悉同過現無別直書初終讚揚洪烈刻諸貞珉永告

沙劫乾統八年歲次戊子九月朔庚申日建

承德府志二十一

按靈巖寺在三座塔東南柏山上遼統和中僧可觀始卜地結庵太平五年邑人趙延貞等施四面隙地重熙初郡人雄武軍節度使王育與邑人尹節高聳等重建二十二年僧潛奧悟開等購經一藏二十四年增建九聖殿清寧四年賜名淨覺寺咸雍六年賜名靈巖寺復有僧志福奏請鑄鐘增構鐘樓壽昌初復建大殿今惟乾統八年戊子碑尙存碑文爲朝請大夫守殿中少監知安德州軍州事上騎都尉涿水縣開國子食邑五百戶賜紫金魚袋耶律劭撰僧恆劭書并篆額碑陰有小篆末題劭述劭書字畫適勁文云余兄文學之外尤工小篆則恆劭殆亦耶律氏子入道者碑在今山上廢安德州城基之側寺已廢見熱河志

靈感寺舍利塔碑銘

天慶六年

張嗣初

夫塔古無有也本出浮屠氏自佛教東被始有之是謂佛廟蓋聞不遷者性也恆動者情也緣情而能有者生也生不可常必至於滅滅不可已復轉於生于此流轉中能解生死之縛而得不生不滅者唯釋迦而已故超然特立於羣聖之上可謂天人師者也然大耄既至終顯有爲故金身示滅當此之際六種震動如須彌傾摧使諸天無所依也嗚呼去聖鎮遠靈蹟不滅故所有舍利爲八國以寶塔分葬之其數凡八萬四千爾後歷載彌久憤廢者甚衆人心特恐亡墜益復興起之或發諸寶函或擘以玉粒或葺其舊制或勑以新作故塔廟之多跡于此也雖殫其筋力嘗不爲勞然竭以資財亦不爲費至若累寶簷絡珠網接雲

漢而起嘗不爲高并閭閻夷井窳有郛郭之半亦不爲廣其人心勤厚
有如此者皇朝定天下以武守天下以文太平旣久而人心向善故此
教所以盛宏凡民間建立佛寺靡弗如意今此塔自太平九年柳城人
梁氏之所建也氏兄弟二人長曰守奇夙植善根次日道鄰素宏願力
自童子時有聚沙之戲後果志於出家旣受具已大通宗乘先隱於龍
岫之一蘭若後爲城中人請居此土一日鉢中忽出異光不散者久之
旣而乃得舍利二粒玉彩晶燦不可正視人爭傳戴之由此乃舍衣鉢
特興塔像復求化官長暨貴戚并豪族之家各助以金帛車服或諸珍
玩計獲數百萬錢共爲成辦之于是火其塲廣若山積募其工翕如雲
合負土于堦者若蟻之累垤汲泥于簷者如燕之巢房凡一十三級通

百有餘尺珠函之靈瑞在乎其中觀夫有金撐以銳其上有廣陛以豐其下豈徒然哉我所貴踴出三界而爲解脫之場也有千歲燈以然於內有百鍊鏡以懸於外亦豈徒然哉我所貴遍照十方而破黑暗之獄也且如風鳴寶鐸盡宣妙法音蟻踐崇塔亦成無上道故一塵所沾一影所覆其利樂信不虛矣噫彼土木有穹窿而崔巍者勿謂我小我小有可觀彼金碧有燦爛而陸離者勿謂我儉我儉能中禮余勿克備述徒止於此焉復常有光數見或五色氣以覆之因上聞之以精誠有感故靈應必通乃勅其寺曰靈感寺大安中有先師之弟子通教師賜紫沙門思整重修以潤色之二先師者蓋愚之祖母故河南太君之伯父也塔初成日我先人嘗欲親志之而不意早沒故弗克逮言今通教師

素與我先人有甥舅之愛每一見必以此事爲託師旣誘我以先人之志能弗繼之我復感師念先師之德可弗述之此者蓋予爲其肯構也故不敢讓乃強爲記云其頌曰旣生必滅唯性不遷不生不滅唯佛能然金身雖往靈跡可傳舍利所至塔以興焉在昔所建八萬四千益遠益敬至於無邊凡厥願力非小因緣乃有梁氏獲此舍利千佛共與一日自至鉢中有光玉粒者二苟非精誠格茲靈瑞乃舍衣盍願作佛事以清淨心置琉璃器藏此塔中以福萬世後有門人以增以新長令淨白不生埃塵敍我以舊託我以文乃強爲述嗣吾先君天慶六年歲次丙申八月壬戌朔甲戌十三日丙寅時建

承德府志二十

按靈感寺在三座塔城內土人耕地得遼碑一爲靈感寺釋迦佛舍

利塔銘遼天慶六年丙申新授尙書都官員外郎遼西路錢帛判官
張嗣初字開二撰文利龍僧悟照字育物書丹碑稱寺爲太平九年
僧守奇道鄰所建作塔十三級以貯舍利大安中僧通教重修碑中
凡光字皆不全書蓋避遼太宗諱也又土人嘗掘地丈餘見地宮一
所周遭嵌列碑文中有釋迦定光二佛的身舍利塔記遼天慶二年
講經律論師慧材撰蓋遼時藏佛舍利於此今廢見熱河志

序

續一切經音義序

沙希 鹿

蓋聞殘純樸而薄道德仁義漸開廢結繩而定著龜文字乃作仰觀玄
像俯視成形蒼頡始制於古文史籀纂成乎大篆相沿歷世更變隨時

篆與古文用之小異逮周禮保氏掌國子學以道教之六書謂像形指事會意形聲轉注假借六者造字之本雖蟲篆變體古今異文離此六書竝爲謬惑春秋之末保氏教廢秦并海內丞相李斯考較籀文別爲小篆吏趨省易變體稍訛程邈改文謂之隸本漢興書學楊雄作訓纂八十九章班固加十三章羣書用字略備後漢許慎集古文籀篆諸家之學出目錄五百四十篇就隸爲訓注作說文解字時蔡伯喈亦以滅學之後請判定五經備體刻石立於太學之門謂之石經仍有呂忱作字林五篇以補許蔡之漏略洎有立說文石經字林之學至大曆中命孝廉生顏傳經國子司業張參等判定五經文字正體復有字統字鏡陸氏釋文張戢考聲韻譜韻英韻集韻略述作旣衆增損互存竝乃傍

通三史證據九經若斯文而有音諸本作言恐音書誤乎卽彼義以無差音義之

興其來有自況乎釋尊之教也四含妙典談有相於權門八部眞宗顯

無爲於實際眞俗雙舉唐梵兩該借以聲名句文爲能詮表以菩提涅

槃爲所證演從印度譯布支那前後翻傳古今鈔寫論梵聲則有一文

兩用誤上去於十二音中數字同歸疑體業向向恐可作於乎八轉聲內考畫

點乃祇如椽以再椽舒亂於手木帳知悵丑雜於心巾袂都佞直著彳

著人裸古裸胡從衣從示諛吐詔丑不分昏以昏音壯側牡莫岡辨

牛語引疾少斫昧於戍哉無點虧於寫富如斯之類謬誤實繁若不討

詳漸乖大義政唐初有沙門立應者獨運先覺天縱生知明唐梵異言

識古今奇字首興厥志切勢披詳始於古華嚴經終於順正理論撰成

經音義二十五卷次有沙門慧苑撰新華嚴音義二卷復有沙門雲公撰涅槃音義二卷復有大慈恩寺基法師撰法華音訓一卷或卽未周三藏或卽偏局一經尋檢闕如編錄不次至唐建中末有沙門慧琳內精密教入於總持之門外究墨流研乎文字之粹印度聲明之妙支那音韻之立旣餅受於先師亦泉瀉於後學棲心二十載披讀一切經撰成音義總一百卷依開元釋教錄始從大般若終於護命法所音衆經都五千四十八卷四百八十帙自開元錄後相繼翻傳經論及拾遺律傳等從大乘理趣六波羅密多經盡讀開元釋教錄總二百六十六卷二十五帙前音未載今續者是也伏以鈔主無礙大師天生睿智神授英聰總講羣經徧糝章鈔傳燈在念利物爲心見音義以未全慮檢文

而有闕因貽華翰見命菲才遣對曠光輒揚螢燭然或有解字廣略釋義淺深唐梵對翻古今同異雖依憑據暨俟來英冀再披詳庶無惑爾

刊本
日本

按原題燕京崇仁寺沙門希麟集德清傳雲龍日本圖經藝文志曰
遼僧希麟撰俊案希麟爲遼人蓋有五證五代史四夷附錄契丹當
莊宗明宗時攻陷營平二州及已立晉又得雁門以北幽州節度管
內合一十六州乃以幽州爲燕京元史地理志大都路唐幽州范陽
郡遼改燕京金遷都爲大興府元太祖克燕初爲燕京路總管大興
府遼史太宗紀會同元年升幽州爲南京地理志又曰燕京契丹國
志二十二南京自晉割棄契丹建爲燕京據此是燕京之名實始於

遼

若陶潛詠瓶軻曰提劍出燕京此詞章家趁韻之法猶周稱周京漢稱漢京不得據此謂遼已前有燕京之名也深雪偶談未足爲信

此

書題曰燕京則希麟爲遼人證一遼人著述見於傳刻者例稱燕京

某寺如石刻稱燕京大憫忠寺燕京興國寺燕京永泰寺之類此書

題曰燕京崇仁寺亦其例則希麟爲遼人證二契丹國志又云燕京

僧居佛寺冠於北方俊謂惟其如此故遼僧以燕寺爲榮卽序人書

者亦沿此例如龍龕手鑑稱燕臺憫忠寺沙門智光序是也此書希

麟自著亦沿例稱燕京崇仁寺矣則希麟爲遼人證三續一切經音

義題曰燕京崇仁寺沙門希麟集日本元文文禩維東獅巖白蓮社

杜多鶴新雕慧琳藏經音義紀事曰燕京崇仁寺沙門希麟述續一

切經音義十卷是亦見在高麗藏開元錄後慧琳未音經論今續者

也紀事述希麟此書次於周雲川西巒行瑄律師晉漢中沙門可洪之後宋沙門處觀之前則希麟爲遼人證四一切經續音義抄主爲无礙大師按无礙大師亦遼僧曾與王正重修雲居寺碑命沙門智光爲記者見房山重修雲居寺碑記時在統和二十三年據此則无礙爲統和時人知希麟亦必同時人矣證五

星命秘訣自序

耶律純

源髓老人得之於元齋元齋得之於海上異人有高麗國師賦其步天警句有云得富非難得壽難壽星須把令星看令星若是逢生旺壽算巍巍等泰山且說夫星是剋星高強必是聘賢人若居父母并兄弟端的因親上致親

書本

按金陵黃氏書目四卷純於政和二年使高麗傳其國禪師星命之學此書一名星命總括但源髓老人云云繆輯無之今據補

遼文萃卷二終

遼文萃卷三

書

封箭諭高麗將書

統和二十八年

聖宗

朕以前王誦紹其祖服事朝廷其來久矣今逆臣康兆弑君立幼故親率精兵已臨國境汝等禽康兆送駕前便即回兵不然直入開京殺汝

妻孥

東國通鑑

致宋帝書

重熙十一年

興宗

弟大契丹皇帝謹致書兄大宋皇帝粵自世修歡契時遣使輜封圻殊兩國之名方册紀一家之美蓋欲洽於繇永固將有以披陳切緣瓦橋

關南是石晉所割迄至柴氏以代郭周興一旦之狂謀掠十縣之故壤人神共怒廟社不延至於貴國祖先肇創基業尋與敵境繼爲善鄰暨乎太宗紹登寶位於有征之地才定并汾以無名之師直抵燕薊羽召精銳禦而獲退遂致移鎮國彊兵南北王府並內外諸軍彌年有戍境之勞繼日備渝盟之事始終反覆前後變常竊審專命將臣往平河右炎涼屢易勝負未聞兼李元昊於北朝久已稱藩累曾尙主克保君臣之道實爲甥舅之親設罪合加誅亦宜垂報邇者郭禎特至杜防又回雖具音題但虞詐謀已舉殘民之伐曾無忌器之嫌營築長隄填塞隘路開決塘水添置邊軍旣潛稔於猜嫌慮難敦於信睦儻思久好共遺疑懷曷若以晉陽舊附之區關南元割之縣俱歸當國用康黎人如此

則益深兄弟之懷長守子孫之計緬維英悟深達惻惻適屆春陽善綏

沖裕

續資治通鑑長編

按長編曰慶歷二年三月己巳契丹遣宣徽南院使歸義節度使蕭

英翰林學士右諫議大夫知制誥同修國史劉六符來致書云云卽

遼史興宗紀重熙十一年春正月遣南院宣徽使蕭特末翰林學士

劉六符使宋事也文存據契丹國志然提要謂國志多取李燾書故

錄其祖本下篇同

與宋誓書

重熙十一年

興宗

兩朝修睦三紀於此邊鄙川寧干戈載偃追懷先約炳若日星今繇祺已深敦好如故關南縣邑本朝傳守懼難依從別納金帛之儀用代賦

稅之物每年增絹一十萬匹銀一十萬兩搬至雄州白溝交割兩界塘淀已前開畝者並依舊例自今以後不得添展其隄堰水口逐時決洩壅塞量差兵夫取便修疊疏導非時霖潦別至大段漲溢並不在關報之限南朝河北沿邊州軍北朝自古北口以南沿邊軍民除見管數目依常教閱無別故不得大段添屯兵馬如有事故添屯卽令逐州軍移牒關報兩界所屬之處其自來成例更替及本路移易不在關報之限兩界逃走作過諸色人並依先朝誓書外更不得似日前停畱容縱恭惟二聖威靈在天顧茲纂承各當遵奉共循大體無介小嫌且夫守約爲信善鄰爲義二者缺一罔以守國皇天后地實聞此盟文藏宗廟副在有司餘並依景德統和兩朝誓書顧惟不德必敦大信苟有食言必

如前誓

續通鑑
長編

按長編云八月乙丑契丹樞密副使保大節度使耶律仁先樞密使
禮部侍郎同修國史劉六符入見其誓書云云

將伐夏遣使告宋書

重熙十
三年

興宗

元昊負中國當誅今將兵臨賊境或元昊乞稱臣幸無亟許

九朝編
年備要

按興宗紀重熙十三年夏六月以將伐夏遣延昌宮使耶律高家奴
告宋卽此書

賜沙門耶思孝書

重熙十
七年

興宗

冬寒司空大師法候安比及來冬差人請去寺望不賜違阻方屬祁寒

順時善加保攝

遼東行部
志引海山文集

使涿州遣宋書

大安七年

道宗

夏國來稱宋兵起無名不測事端

宋史外國傳二

按宋史稱遼使涿州遣宋書云云神宗報之事在元豐五年正月則

大安七年也

遣蕭德崇等爲夏人議和使宋國書

壽隆五年

道宗

粵惟夏臺實乃藩輔累承尙主迭受封王近歲以來連表馳奏稱南兵之大舉入西界以深圖懇求救援之師用濟攻伐之難理當依允事貴解和蓋遼之於宋情重祖孫夏之於遼義隆甥舅必欲兩全於保合豈知一失於綏存而況於彼慶歷元豐中曾有報聞皆爲止退寧謂輒違先旨仍事遠征儼蔽議以無從慮造端之有自

契丹國志